

**Partiit nunanit allanit tapiissutinik tapiissuteqartunik pissarsiaqarsinnaatitaannginnermut aamma partiit nunatta avataani najugaqartut angerlarsimaffeqartulluunniit Qallunaat Nunaanneersut Savalimmiuneersullu inerteqqummut ilanngunneqarnissaat pillugu Inatsisartut inatsisaat nr. 14, 4. februar 2025, §4b allanngortinneqarnissaanut Naalakkersuisut inatsimmut allannguutissamik suliaqaqqullugit Inatsisartut aalajangiiffigisassaattut siunnersuut. Siunnersuut kingusinnerpaamik UKA2026-mi saqqummiunneqassaaq.**  
(Naalakkersuisut Siulittaasuut)

### **Akissuteqaat**

(Naalakkersuisut Siulittaasuut)

### **Aappassaanneerpeqarnera**

Inatsisinut Ataatsimiititaliamut apeqquummik matuminnga peqqissaartumik suliaqarsimaneranut qujanaq.

Inatsisartuni partiit amerlanerussuteqartut siunnersuutip, siullermeerneqarneranut atatillugu, akuerineqarnissaa inassutigaa. Tamatumani annertuumik piumassuseqarneq, siunnersuutip partiit oqaaseqartuinnit aammalu Naalakkersuisunit takutinneqartoq, takuneqarsinnaavoq.

Tassunga atatillugu oqaatigineqarpoq, Inatsisinut ataatsimiititaliaq siunnersuutip iluarsineqarnissaanut siunnersuuteqartoq, taamaalilluni ilaatigut oqaaseq “tapiissutit” erseqqissarneqassalluni, ilaatigullu tapiissuteqartartunit nunanit allaneersunit pissarsinissap inerteqqutigineqarnera, aamma Danmarkimi Savalimmiunilu partiit nalunaarsorsimasut, taakkua Kalaallit Nunaata avataani najugaqarpata imaluunniit angerlarsimaffeqarpata, ilaatilerlugit, annertusitinneqassalluni.

§ 4 b-p oqaasertalerneqarnera atuuttoq toqqaannartumik aningaasaqarnikkut tapiissutinut sammitinneqartoq, kisianni suliaqarnermi tapiissutit aningaasanik nuussinermiit allaaneruumik iluseqarlutik pisoqarsinnaalluni, assersuutigalugu aningaasaanngitsunik tunniussaqaqarnertut, kiffartuussinertut, akikillisaatit imaluunniit allap suliaannut akiliutit akilerneqarsimasut ilusilittut, pisoqartarnera pillugu Inatsisinut Ataatsimiititaliaq erseqqissaanera Naalakkersuisut akueraa. Tamatumaa aalajangersakkap atorneqarsinnaassusaa pillugu nassuiaanermi nalornilersitsisinnaanera Naalakkersuisut akueraat. Taamaattumik “tapiissutit” qanoq paasisariaqarnerisooq erseqqinneruumik erseqqissaanissaq pisariaqartinneqarsinnaasoq Naalakkersuisut isumaqataapput, taamaalilluni inatsimmi aamma aningaasaqarnerinnakkut tapiissutinut allaaneruumik tapiissuteqartarneq, tamakkiisumik ilaannaasumilluunniit aningaasaqarnikkut tapiissutinut sanilliunneqarsinnaasoq, pineqartunut ilaatinneqalissalluni.

Tamanna tungavigalugu oqaatsip “tapiissutit” erseqqissarneqarnissaanik Inatsisinut Ataatsimiititaliaq kissaateqarneranut Naalakkersuisut tapersiipput aammalu naalakkersuinikkut ingerlatsisut partiit naatsorsuutaasa tamanut saqqummiunneqartarneri pillugit Inatsisartut inatsisaata iluarsineqarnissaa piareersimaffigalugu. Naalakkersuisut tassunga atatillugu inatsisinik piareersaalluni suliaqarnermi pisussami ajornartorsiutit qaqinneqartut ilanngutissavaat, ilanngullugu toqqaannartumik taamatullu toqqaannanngitsumik partiinut tapersiissutinik ersarissumik paatsuugasaanngitsumillu maleruagassiinissap qulakkeerneqarnissaata pisariaqartinneqarnera. Tassunga atatillugu aammattaaq inerteqquteqarnerup annertusitinneqarnissaa pingaartinneqarpoq, taamaalilluni aamma partiinit

Danmarkimi Savalimmiunilu nalunaarsorsimasunit Kalaallit Nunaanni najugaqartunit imaluunniit angerlarsimaffeqartunit tapiissutit aamma matumani pineqartunut ilaalissallutik.

Taamatut oqaaseqarlutik Naalakkersuisut inassutigaat Inatsisartut Inatsisinut Ataatsimiititaliap allanngortinneqartussatut siunnersuutai ilanngullugit aalajangiiffigisassamut siunnersuut Inatsisartut akuerissagaat.